

四庫全書

史部

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷二十一

恤民一

康熙六年丁未五月丙午

上諭吏部等衙門民為邦本必使家給人足安生樂業方
可稱太平之治近聞直隸各省民多失所疾苦顛連深
可憫念或係官吏貪酷朘削窮黎抑或法制未便致民

失業果何道以遂其生耶一切民生利病應行應革爾
內外各衙門大小文武等官念切民依其抒所見毋隱
康熙七年戊申六月辛巳戶部覆報災定例夏災
不出六月秋災不出九月但踏勘於收穫未畢之
先始可分別輕重請嗣後報災限期夏災不過五
月初一秋災不過八月初一踰期仍如例治罪

上曰凡被災州縣有司必先勘察申報該撫然後具題地
方遠近不一若限期太迫被災之民恐致苦累其仍如

舊例行

七月乙卯直隸巡撫甘文焜請復巡歷舊規部議
不准

上曰前諭各省遇有水旱等災督撫務減儀從將被災地
方作速親勘欲令體訪貪虐官吏重加懲治且使兵民
疾苦地方應行之事得以驗實更改督撫若不巡歷屬
員反借災荒顛倒重輕私行科派俱未可定甘文焜所
請著准行

康熙八年己酉三月辛丑

上諭戶部前以爾部題請直隸等省廢藩田產差部員會同各該督撫將荒熟田地酌量變價今思既以地易價復徵額賦重為民累著免其變價撤回所差部員將見在未變價田地交與該督撫給與原種之人令其耕種照常徵糧以副朕愛養民生之意

康熙九年庚戌正月己酉初直隸各省廢藩田產奉

旨免其易價改入民戶名為更名地內有廢藩自置之地
給民佃種者輸糧之外又納租銀重徵為累而戶
部議以久載全書不當蠲免

上曰更名地內自置田土百姓既納正賦又徵租銀實為
重累著與民田一例輸糧免其納租至易價銀兩有徵
收在庫者許抵次年正賦

康熙十二年癸丑三月辛巳

上諭禮部民資粒食以生今當播種之時亢暘不雨農事

堪憂皆由朕躬涼德政治有所未協未能仰格

天心用是夙夜靡寧實圖修省以感召休和為民請命爾部即虔誠祈禱雨澤以副朕勤恤民隱至意

四月癸卯

上諭巡視五城御史曰每遇民間失火朕常遣侍衛往救聞爾巡城官員於失火時即執伊家主查訊恐其家一切財物無人照看必至匪類乘機竊盜深屬無辜此後俟火息時再行查議

十一月庚午

上諭戶部自古國家久安長治之模莫不以足民為首務
必使田野開闢蓋藏有餘而又取之不盡其力然後民
氣和樂事成豐亨豫大之休見行墾荒定例六年起科
朕思小民拮据開荒物力艱難恐催科期迫反致失業
朕心深為軫念嗣後各省開墾荒地俱再加寬限通計
十年方行起科其所司官員原有議敘定例如新任官
自圖錄敘掩襲前功紛更擾民者各督撫嚴行稽察題

叅治罪

康熙十三年甲寅正月癸未

上諭兵部近因吳三桂背恩叛逆已遣大兵前往征勦聞楚省百姓有先行驚避者輕離家室恐致失所朕心深為憫念向來大兵紀律嚴明所過並無騷擾今寧南靖寇大將軍啓行朕面加誠諭務令秋毫無犯安輯地方逆寇煽惑不過一隅大兵到日立見蕩平該地方軍民人等俱係朕之赤子遣發大兵原以衛民不必驚懼著

地方官廣行宣諭俾各安生理勿致流離以副朕定亂安民之意

戊子

上諭兵部刑部近因逆犯楊起隆詐稱朱三煽惑愚民潛謀不軌逆黨相繼緝獲業經審明正法牽連人犯槩行省釋除逆首楊起隆等仍行嚴緝外其餘黨羽亦從寬免緝俾得改行從善恪遵法紀勿致自干憲典軍民人等俱宜各安生業不得聽信訛言自生疑懼旁人亦不

許妄行首告借端嚇詐擾害善良爾部即出示通行曉諭

二月辛酉

上諭戶部兵部逆賊吳三桂心若虺蛇行同梟獍負恩謀叛倡亂害民當明季闖寇入京吳三桂勢窮來歸我

世祖章皇帝念其投順優待有加寵以王爵托以腹心嗣大兵克復黔滇巖疆初定令其移駐防禦畀以事權及朕即位以來推誠尤至兩省官職聽其選擇題授給養

家口兵丁歲費不貲且欲其感恩知報特加親王人臣之分已極委任之專無比乃去年伊自具疏求歸故土朕憫其久在邊遠勞於戎事年已衰殘欲令其父子祖孫得以完聚准與遷移遂其所請復為之區畫房地資給行糧眷念體恤委曲周至詎意包藏禍心久蓄不軌陽報起程日期遽乃擁衆倡叛蹂躪百姓竊踞城池散布偽劄妄張聲勢以致鄰近州縣無知之徒被其煽惑又復假造訛言潛行傳布以冀搖動愚民種種狡謀悖

天茂理即屢次發兵朕皆嚴諭將帥令體朕軫念斯民至意務期秋毫無犯無非欲救濟百姓安輯地方今寧南靖寇大將軍王等率領大兵各路進剿不日殲滅以行天誅吳三桂反覆亂常不忠不孝不義不仁為一時之叛首實萬世之罪魁行即懸首藁街以洩神人之憤猶恐小民輒相驚疑不察虛實妄行聽信立意一差如蹈陷阱邪正之介即禍福之關身家性命所繫不小朕心不忍赤子悞罹法網有傷天和爾部即行文直隸各

省督撫刊刻告示通行所屬各州縣徧諭百姓俾各安
生業勿聽訛傳以副朕保全元元之意

四月丙申戶部議河南彰德府因大兵經行秣馬
需用芻豆業令採辦運送甫至中途而大兵已過
應發還民間

上曰芻豆已經運送復還民間恐致苦累其見在未給草
豆准令存貯以備續發軍需

十一月辛未

上諭兵部凡陷賊地方皆我赤子今者詰爾戎兵四征不庭原以除暴安民念愚氓被脅鬻髮特一時貪生畏死之恒情若大兵所至槩行誅戮非朕救民水火之意百姓無由自新狡賊反得藉以煽誘嗣後大兵進剿有鄉民持械拒敵及竊踞城池山寨不即迎降者仍行誅戮其餘槩從寬免至勦殺賊徒自應俘其子女但賊營婦女多係擄掠脅從破賊之後凡所擄難民子女許民間認領不得一槩妄收爾部其傳諭滿漢官兵咸體朕意

毋忽

十二月壬寅

上諭禮部古帝王撫御天下莫不以禮制為先務然釐定章程必文質適中方可昭垂永久前見風俗近奢恐漸流於僭濫故令更定條例一切服飾力從儉樸冀返淳龐詎意有司奉行過當專事苛細借端紛擾以致商賈壅滯物力匱乏小民深為未便以後著仍照康熙九年定例遵行見今一應禁約俱行停止爾部即遵諭行

癸丑陝西總督哈占奏陝西百姓供應芻糧疲於奔命請令山西就近輸運

上諭曰山西運糧水路則有黃河汾渭之險陸路輸輓則道遠費重民不能堪著戶部發銀十五萬兩擇能員解至西安採辦供應聞秦民亦值困苦之際軍需芻糧若令價值稍增民爭什一之利自樂於輸送不悞軍需倘有不肖官員苛派侵剋使民不得均沾實惠者督撫指名劾奏從重治罪

康熙十五年丙辰二月丁巳

上諭兵部湖南百姓遭亂以來困苦萬狀賊糧匱乏勢窮恣行劫掠百姓罹其荼毒如在湯火今大兵剋期進發正解民倒懸之日其令大將軍等遣賢能官同地方官宣布撫民敕諭凡恢復城池後勿妄殺掠以輯人心以綏地方

康熙十六年丁巳二月辛酉

上諭戶部閩地經海孽擾亂又遭逆賊暴征橫斂民困已

卷二十一
極今年錢糧盡予蠲免其遭亂竄避人民俱招徠還籍
俾各安本業

康熙十八年己未四月甲戌

上諭禮部民資粒食以生今時值夏令雨澤未降久旱傷
麥秋種未下農事堪憂皆由朕躬涼德政治未協大小
臣工不能潔已愛民勤修職業致干

天和朕用是夙夜靡寧深切警惕實圖修省諸臣亦用循
省過愆恪共乃職期於共襄治理感召休和茲當虔誠

齋戒躬詣

天壇親行祈禱為民請命爾部即擇期具儀以聞

十二月癸未戶部議撥盛京成熟地畝分給新滿洲

上曰田畝百姓生業所關以熟地撥給新滿洲恐生民困苦可更議兩便之法

康熙十九年庚申二月丁卯

上諭戶部前因各省饑饉已遣官賑濟今京師附近地方

流民甚多朕心深為憫惻若不亟行安插令其得所難以生全作何設法俾各歸原籍著該地方官加意撫綏安集復業以免流離九卿詹事科道詳議具奏

十月庚子

上諭大學士等曰各旗差遣家人或往外省索債或令隨官赴任或以私情干求外官者甚多小民最為苦累若詳加察究則各旗不遣家僕出外者能有幾人此等累民之事爾等可令吏兵刑三部及都察院會同定例嚴

禁

康熙二十年辛酉二月癸巳

上諭戶部直隸各省清察隱占田畝州縣有司或利其陞
敘虛報田糧攤派民間致滋苦累亦未可定爾部可檄
行直隸各省督撫著嚴行察覈以除其弊

四月戊子

上駐蹕三屯營西南

命學士禧佛往諭遵化州知州鄭喬生曰鮎魚池周圍地

畝不許蹂踐雖屢經嚴諭未必無礙田禾著知州親行細察所傷地畝若干應納錢糧若干俟回鑒日轉奏

十一月辛酉

上諭大學士等曰朕頃駐固安任邱聞戶部官員將各州縣均派草豆甚為擾民工部向民間私借柴炭亦多擾民俱宜嚴禁又聞部院各官借稱預備差遣無故傳集窮民跟隨苦累俱宜嚴禁每次巡幸騷擾百姓者多係部院各官可傳諭嚴飭以後毋得再蹈前轍

康熙二十一年壬戌正月辛未

上諭戶部漕糧定例官收官兌獨浙省民兌另立私截之名困苦百姓著檄巡撫嚴禁違者即行叅劾

八月辛巳先是潼關額稅七千餘兩有司徵收康熙十九年始遣郎中敦多禮督徵得稅四萬餘兩至是例請部員更替

上諭曰數年以來秦省兵民苦於輓運潼關收稅仍照舊額著停止差遣部員

甲辰

上諭戶部朕聞先由水路出征大兵因晝夜趲行以致緯夫死者甚多深軫朕懷今爾部差去催趲糧船官員恐欲糧船速抵水次致緯夫苦累著行文申飭曉諭

九月壬戌

上諭大學士等曰自用兵以來百姓供應煩苦朕前屢言俟天下蕩平將錢糧寬免爾等可同戶部先將天下錢糧出納之數通算啓奏至陝西一省供應較他省苦累

更甚錢糧尤宜寬免

十二月壬午兵部議准雲南貴州總督蔡毓榮請
禁土司民人攜藏兵器及漢人將鉛硝硫黃售與
外彝

上曰聞衆土司人等賴弩弓長鎗捕獵為業今若槩行禁
止則失其生計矣治民惟在所司官撫綏安戢倘不愛
民肆其殘虐民操白梃亦可為非爾等其詳議以聞

康熙二十二年癸亥七月辛卯

上駐蹕陳穀莊

諭八旗護軍統領等曰穀者民生之命一歲不登則一歲
乏食今正秋收之時田穀未穫向恐擅放馬匹蹂踐禾
苗屢降明諭傳飭今觀隨從人等尚有不遵法令蹂踐
民田者爾等各嚴緝以聞

九月戊子

上奉

太皇太后幸五臺途次遇村民負米豆等物詢之云備臨

幸之用隨傳

諭大學士等曰

太皇太后駕臨五臺一切應用之物皆出內帑預備原無絲毫取給小民此所備物件何處應用可察明具奏隨詢五臺知縣趙繼晉及村民等皆云五臺地方偏僻恐物用不敷故給價小民令預備以待用原非出於科派

上曰一切物用內廷既備此後不必再行齎送可傳諭直

隸山西沿途官民知之

康熙二十三年甲子四月丙辰工部題請

敕諭直隸河南巡撫嚴飭所屬官員閉塞衛河水口勿使
旁洩以濟漕運俟漕船過完照常聽其分流

上曰漕運所關雖係甚重但直隸河南之民多資衛河水
利若水口盡行閉塞不使稍溉田禾一遇旱乾瀕河之
民必致艱苦又部議俟漕船過後方聽照常通流耕種
自有定時如漕船過完方許溉田則於田禾無濟該部

但期不悞漕運初未嘗慮及民生也此事著另行確議
奏聞

五月壬午戶部奏丈量旗下圈地凡有溢額者請
另行撥給

上諭大學士等曰田地為民恒產已經給與者不便復行
取回其旗下大臣官員既有溢額之地理宜註冊俟需
用時再行撥給民地不可輕動

九月甲子朔

上諭大學士等曰向令開海貿易謂於閩粵邊海民生有益且此二省民用充阜財貨流通則各省亦俱有益夫出海貿易本非貧民所能富商大賈懋遷有無薄徵其稅可充閩粵兵餉以免腹地省分轉輸協濟之勞腹地省分錢糧有餘小民又獲安養故令開海貿易今奉差卽中伊爾格圖奏請給與各關定例款項於橋道渡口等處槩行徵稅何以異於原無稅課之地反增設一關科斂乎此事恐致擾害民生爾等傳諭九卿詹事科道

集議以聞

十月辛亥

上駐蹕桃源縣重興集視隄夫工作駐轡良久親加慰勞
復

諭河道總督靳輔曰隄工夫役風雨晝夜露宿草棲勞苦
倍常所領工食無幾恐有不肖官吏從中侵蝕必使人
沾實惠爾其加意軫恤

癸丑

上諭江南江西總督王新命曰朕巡視直隸山東江南惟
高郵等地方百姓甚為可憫今雖水涸民擇高阜棲息
但廬舍田疇被淹未復生業朕心殊為不忍爾係地方
大臣應作何籌畫濬水通流拯此一方民命以副朕軫
恤黎元至意

甲寅

御舟過高郵湖見民間田廬多在水中惻然念之因登岸
巡行隄畔十餘里召耆老詳問致災之故

諭王新命曰朕此行原欲訪問民間疾苦凡有地方利弊必設法興除使之各得其所昔堯憂一夫之不獲況目覩此方被水情形豈可不為拯濟耶

庚申

上諭江蘇巡撫湯斌曰朕欲周知地方風俗小民生計有事巡行凡需用之物皆自內府儲備秋毫不取之民間恐地方有不肖官員借端妄派以致擾害窮民爾其加意嚴察如有此等即指名題叅從重治罪其沿途供役

緯夫及聞朕巡行至此遠來聚觀百姓恐離家已遠不能自歸爾逐一詳察多方區畫令其還家

十一月丁卯

上諭吏部尚書伊桑阿工部尚書薩穆哈曰朕巡幸東南省民疾苦路經高郵寶應等處見民間田疇廬舍被水淹沒朕心甚為軫念詢問其故具悉梗梁高寶等處湖水下流原有海口以年久淤淤遂至壅塞今將入海故道濬治疏通可免水患自是往還每念及此不忍於懷

此一方生靈必圖拯濟安全咸使得所始稱朕意爾等
可往被水災州縣逐一詳勘於旬日內覆奏務期濟民
除患縱有經費在所不惜爾等體朕至意速行

康熙二十四年乙丑四月戊戌順天府府尹張吉
午請自康熙二十四年始凡民間開墾田畝永免
圈取部議不允

上諭大學士等曰民間自開墾田畝若圈與旗人恐致病
民自後永不許圈如旗下有當撥給者其以戶部見存

餘田給之

五月丙戌工部議覆湖廣浙江採運楠木不能如期特請寬限應不准行

上諭大學士等曰朕聞明時採運楠木從山至河民力告竭地方苦累今運各省所備楠木杉木若程限太迫恐山路崎嶇轉運艱難地方雖有良吏不能不苦累百姓其令部臣詳議緩運勿致累民

戊子

上諭大學士等曰今歲雨暘時若二麥已登他穀亦皆沃
茂秋成可望黎民不致阻饑但豪強富室田土既多收
穫亦豐往往用之釀酒又輕值收糴以待重價貧民田
少收穫有限更不節用效尤釀酒亦甚糜費雖遇豐年
僅免饑饉倘遭荒歲何以自贍朕巡省閭閻歷歷親觀
每一念及惻然疚懷應作何禁止使家給人足爾等可
籌良策以待秋期舉行

九月甲申戶部題張家口諸處倉廩應令地方官

設法修造

上曰若令地方官設法勢必加派於民可即以本處稅銀修築
十月癸卯內閣以工部修治京城道塗冊進呈

上曰工價支給尚少宜稍加增至修治小路若責之居民
則貧人苦累矣其令如大路估算亦以錢糧給之

康熙二十五年丙寅二月壬子九卿等議覆四川
松威道王鵬條奏四川楠木採運艱難請行停減
應不准行

上曰蜀中屢遭兵燹百姓窮苦已極朕甚憫之豈宜重困
今塞外松木材大可用者甚多若取充殿材即數百年
可支何必楠木著停止川省採運

康熙二十六年丁卯十一月乙未

上諭大學士等曰近見支用修造等項奏銷錢糧時該部
不准駁回者甚多此等奏銷屢行駁回官員未必捐索
補給亦止派取民間耳如此則百姓愈苦向因需用孔
亟故奏銷者未即准行今公帑並非匱乏之時奏銷案

件不必駁回即應完結此等事不行駁回在官員雖稍獲便利而於百姓乃大有裨益也

康熙二十七年戊辰七月甲午

上諭大學士等曰今武昌地方平定江寧京口荊州諸路兵仍赴武昌則轉輸供應民力維艱滿洲漢軍及調集綠旗兵皆令各歸本汛又遇難官民之妻子恐以賊黨株累可令該撫察明奏聞

康熙二十八年己巳二月乙卯

上巡幸浙江自杭州回鑾舟泊石門鎮

諭扈從部院諸大臣曰朕巡省民生風俗行次浙江見省會兵民俱相和輯生齒蕃庶閭里乂安但觀民間習尚好為爭訟爭訟一興則不肖有司因緣詐索勢所必至縱或官員無所朘削而胥吏作奸究不能無私行勒取之弊小民之牽連苦累者多矣夫微忿不捐搆成嫌怨小則耗損物力大則傾隕身家其為蠹害不可勝言矜此愚民允宜深戒地方大小衙門官員亦應各簡詞訟

勸導閭閻俾守分息爭共安生業又夙聞東南巨商大
賈號稱輻輳今朕行歷吳越州郡察其市肆懋遷多係
晉省之人而土著者蓋寡良由晉風多儉積累易饒南
人習俗奢靡家無儲蓄目前經營僅供朝夕一遇水旱
不登則民生將至坐困苟不變易陋俗何以致家給人
足之風爾等可傳諭將軍總督等令家喻戶曉務使敦
本興讓崇儉黜浮兵民日益協和風俗日益淳樸詞訟
日益減少積儲日益豐盈則教洽化行朕心實嘉賴焉

康熙二十九年庚午二月己卯

上諭江南江西總督傅拉塔曰蠲免錢糧原欲使小民物力稍舒漸登殷阜前已頒諭旨民間建立碑亭頌揚德意雖出羣黎愛戴之誠但恐致煩民力嗣後地方官員不得借端修葺碑亭以滋擾累

六月丙戌

上諭戶部朕撫育烝黎勤求民瘼務期休養漸至阜安閭閻間有疾苦朕衷時切軫念近見廣東高瓊等府地丁

各項錢糧歷年逋欠如係官役侵漁及豪強頑梗抗不輸納自應嚴追倘因丁缺地荒不能輸納仍行徵比照例考成則小民既困追呼有司復罹叅罰徒滋擾累終無裨益著該督撫以各州縣舊欠錢糧不能辦納情由詳悉察明具奏

七月丙午

上駐蹕正紅旗鷹莊

諭大學士伊桑阿尚書顧八代等曰朕沿途閱視見所踐

田禾過於朕初時諭旨部中文量者惟鞍匠屯以南過此並未丈量何地非朕赤子可令侍郎賽弼漢即自口以北至坡賴村凡所踐田禾作速明晰丈量

康熙三十年辛未九月己巳

上諭戶部朕頃巡行邊外入喜峯口見民間田畝多為蝗蝻所傷又聞榛子鎮及豐潤縣等處地方被蝗災者亦所在間有秋成失望則民食維艱朕心深切軫念倘及時不為區畫儲蓄恐至來歲不免饑饉之虞著行該撫

親歷直隸被災各州縣通行察勘悉心籌畫應作何積貯該撫詳議具奏其被災各地方明歲錢糧若仍照例催科小民必致苦累著俟該撫察報分數到日將康熙三十一年春夏二季應徵錢糧緩至秋季徵收用稱朕體恤民生休息愛養至意

康熙三十二年癸酉六月庚子

上諭大學士等曰朕每見各省往來及請安之人必問地方情形雨水霑足與否前問自江浙來者俱言今歲甚

旱五月二十日尚未得雨朕幸江南深知彼處民生家
無二日之儲所食之粟每日糴買若五月以後仍不得
雨則米價騰貴貧民必至困苦此不可不預籌者著遣
戶部才能司官二員一往江南一往浙江詳問督撫觀
看雨水形勢來奏江浙地方雨水雖大若不沒禾穗水
消禾即復舊故澇不足慮旱則所蓄之水盡涸真無計
可施朕又曾見舟中滿載猪毛雞毛問其故曰福建稻
田以山泉灌之泉水寒涼用此則禾苗茂盛亦得早熟

朕記此言將玉泉山泉水所灌稻田亦照此法果早熟
豐收江浙稻田俱池中蓄水灌之池水不寒所以不用
此也

八月丁酉戶部議覆漕運總督興永朝疏言江北
盧鳳淮揚等處漕糧請紅白兼收應不准行

上曰米取圓淨各隨其地所出不論紅白令兼收勿勞百
姓

十一月庚申

上諭大學士等曰今歲畿輔地方歉收米價騰貴通倉每月發米萬石比時價少減糶賣其糶時止許貧民零糶數斗富賈不得多糶轉販始於民生大有裨益又蒸造燒酒多費米穀今當米穀減少之時著戶部速移咨該撫將順永保河四府屬蒸造燒酒嚴行禁止

康熙三十三年甲戌二月癸酉直隸巡撫郭世隆等疏言臣遵

旨會同戶部員外郎雍泰查霸州文安等州縣及天津衛

見在貯倉米穀共十萬餘石將此米賑濟霸州等
州縣饑民需用三萬石所餘米穀應減價糶賣其
景州等州縣將山東漕米截留平糶

上曰霸州等被水災地方所有積穀除散賑外餘著減價
發糶其沿河一帶景州等各州縣衛所著將山東漕米
每處截留二千石亦發糶以平米價著戶部行文該撫
責成州縣實心奉行務俾小民均沾實惠朕不時遣人
稽察如小民有不沾實惠將該管官一併從重治罪斷

不寬宥

丁亥

上諭大學士等曰通州倉米平價發糶米價頓減於民大有裨益又沿河一帶州縣已截留山東漕運糶與百姓誠恐不肖地方官員或增價發糶或糶與販賣之人以致百姓不沾實惠著巡撫郭世隆不時巡察

四月庚辰

上諭大學士等曰朕雖處深宮日以民生為事每巡視郊

外必詳察農桑咨詢稼穡是以深悉農家之事應於農
事之先早為籌畫方有裨益朕以去歲雨水霑潦立春
稍旱蝗種必致為災故諭直隸山東河南等處地方官
傳諭民間早耕田地將蝗種掩埋則後患可除今已立
夏或有餘蝗遺種漸漸長成致害田稼亦未可知村莊
愚民往往以蝗不可捕待其自去此等愚昧之言尤宜
禁止捕蝗弭災全恃人力今差戶部司官一員宣諭直
隸山東巡撫令各州縣官員凡有蝗出即親至其地率

民掩捕無使為災再傳諭河南山西陝西等處地方咸使知悉一體遵行

五月丁巳

上巡幸畿甸閱視河隄

諭內大臣等曰扈從衛士魚貫而行無得踐踏民田著派侍衛等嚴查

九月甲申

上諭戶部朕惟黎元率育全恃農桑每遇歲時豐穰比屋

皆能自贍倘一經旱潦粒食無資即有俯仰不給之虞
非相緩急而先事圖維則補助之恩難以徧沛頃巡歷
邊外道經密雲等處地方見田畝歉收米穀價貴閭閻
匱乏衣食不充目前既已艱難後歲何所依賴宜豫為
籌畫用俾資生著遣部院堂官二員會同直隸巡撫親
詣年歲不登之各州縣詳察明白應作何區處賑濟確
議具奏其八旗披甲當差及孤寡無依年老有疾中傷
退閒人等有實係貧窶窘於謀生者著各該都統詳察

姓名報部酌量恩恤爾部即遵諭行

十一月癸酉吏部右侍郎安布祿工部右侍郎常綬等奏臣等遵

旨查直隸安州等十一州縣貧民十萬餘口應賑米四萬餘石

上諭大學士等曰朕思直隸米價騰貴小民艱苦若僅照數給發誠恐無益著將此米一半散給百姓一半照目前米價折銀給與貧民所餘之米著視時價酌減令民

賤買如此則百姓既得銀兩而糴米又易庶小民均沾
實惠其安州等十一州縣康熙三十四年地丁錢糧盡
行蠲免又

諭曰密雲順義附近地方今年米穀未收除常平倉所貯
米穀照常糴賣外并將前轉運積貯之米每月發千石
平價糴之遺戶部賢能司官各一員監視糴賣

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷二十一

欽定四庫全書

史部

聖祖仁皇帝聖訓卷二十四

臣 永瑤 恭 校

編 修 臣 裴謙 覆 勘

總校官原任中允 臣 王燕緒

校對官中書 臣 田尹衡

謄錄監生 臣 王頌修

欽定四庫全書

大清聖祖合天弘運文武睿訓恭儉寬裕孝敬誠信中和
功德大成仁皇帝聖訓卷二十二

恤民仁

康熙三十四年乙亥正月戊寅

上諭大學士等曰興永朝奏請丈量湖南田地有累於民
否治國之道莫要於安民或有不肖州縣官將田地竟
不待丈量而輒稱餘田加賦者亦未可定安有加增田

賦而全不累民之理著湖廣總督吳璵詳察具奏

四月庚子戶部題天津開河工程行文附近州縣
派夫定限挑濬

上曰若行文各州縣定限派夫必至苦累民間著停止行
文即發與催價令天津等處催民挑濬如此則公事既
得告成而窮民亦可資以度日矣

五月壬戌朔

上諭戶部尚書馬齊曰爾傳諭巡撫噶爾圖平陽等處地

震房舍倒壞人民壓斃伊應親身於彼處設厰居住將
被災百姓救護候朕諭旨乃遽回省城殊屬不合除噶
爾圖所奏外有地震重處爾可詳察閱視加恩賑給本
年應徵錢糧停其徵收爾到彼處即曉諭衆民皇上為
爾百姓深切軫念特遣大臣賑救爾衆民毋妄遷徙離
散且恐因地震地方不良之人及鎮標兵丁借端搶奪
擾害生民傳諭總兵官周復興親身率領官兵將此一
帶地方善為防護其平陽府洪洞縣被災百姓爾會同

巡撫噶爾圖親身到彼處賑濟務令均沾實惠

六月癸卯

上諭大學士等曰時值久雨連綿乍止復雨將不利於田稼朕甚憫焉亟宜祈晴其傳禮部速議以聞

康熙三十五年丙子七月庚申

上諭戶部朕親征時聞宣化府牧養三旗駝馬所需草豆甚急皆先派龍門赤城蔚州百姓供用後給價值恐小民不能如數支領著該撫委地方賢能官查明照價估

給務令小民得沾實惠以副朕撫恤至意此地百姓供
應軍需修治道途勞苦可憫俟冬間當免其來年之賦

九月丁丑

上諭大學士阿蘭泰等曰右衛兵丁馬匹若在大同一處
喂養恐累小民著侍郎阿爾拜前去與監喂內大臣酌
量於附近州縣分養務給實價毋苦百姓

十二月辛亥

上諭大學士等曰去歲霸州等處州縣曾運通州之米與

被災百姓減價平糶閭閻甚為得濟今年水災更甚應如去歲運米於各州縣平糶可敕直隸巡撫沈朝聘何州何縣當運米若干與民懋遷之其作速具摺奏聞勿緩俟開印時也

康熙三十六年丁丑二月乙未

上諭大學士伊桑阿曰修理道路專責之地方官恐至太過可遣鄉導官法保布達修一車可行之道足矣山西道路著按察使巴什道員王輔鳩工督修令侍郎常綬

前去按站備辦草料柴薪渡黃河後陝西路濶無庸大修或有宜畧修處著常綬等驗視令地方官修之若修路太過勞及百姓責在法保布達與地方官無涉也

戊戌

上諭右衛將軍宗室費揚固曰山西巡撫倭倫等頃給發右衛官員兵丁米豆草價值較時價減少以致窮兵苦累亦未可定又詢察大同府所屬州縣衛所之民運送右衛官兵馬匹所用草束殊為苦累可將官兵之馬各

留一匹於右衛餘馬發附近州縣衛所酌派官員兵丁看守飼養小民可免運送之苦此後每草一束作何給價著議政大臣大學士在事官員會同爾等議奏

辛丑

上諭山西巡撫倭倫陝西巡撫党愛甘肅巡撫郭洪等曰朕比年出師勦寇總期久安邊徼永輯民生茲厄魯特噶爾丹勢威力窮畏死悔罪遣使具奏乞降朕特親統六師再臨邊塞相機勦撫因乘便巡覽邊境形勢察視

軍民生業遂發禁旅取道邊外朕自大同從內地前赴
寧夏一路地方見緣邊州縣地土瘠薄軍民生計艱難
朕心深切軫念一切御用所需皆自內廷措辦不以煩
民扈從簡少市易之物悉依時值誠恐有強取抑價等
事已令都察院及科道官逐日稽察糾劾其經過城堡
衝市輒多結綵殊覺擾累嗣後著通行禁止乘輿巡幸
本為安民豈可反勞民力爾等務嚴飭有司不得借端
科派仍張示曉諭俾窮簷編戶咸悉朕曲體民依至意

閏三月甲午寧夏紳衿兵民人等聞

駕起行齊集

行宮前叩懇

皇上駐留數日以慰羣情

上曰朕欲掃蕩寇氛以安黎庶特幸寧夏經理軍務駐蹕
十有餘日曩者南巡凡所巡幸之處未有駐蹕至三日
者且邊地磽瘠民生艱苦朕甚憫之朕扈從人衆恐多
留一日即滋百姓一日之擾朕已定於十五日起行爾

等誠懇之意朕已知悉又向者曾欲使禁軍駐防此地恐民間居處狹隘已命將房舍查明給還本主爾等即回故居可也

五月丙申

上諭大學士九卿等曰朕前巡幸直隸山東江南浙江見地方人民皆各安生業大小官員恐朕不時臨幸咸兢兢守法奉職以為他省類皆如此頃由大同歷山西陝西邊境以至寧夏觀山陝民生甚是艱難交納錢糧其

火耗有每兩加至二三錢不等者前曾面問總督吳赫據言西安等府距省甚近收耗尚輕若沿邊所在地方火耗不免加重矣至於山西特一小省聞科派竟至百萬民何以堪科道官因朕已經訪問始行叅劾竝未有言於未發覺之前者亦屬何益

戊戌

上諭吏部等衙門朕頃以狡寇噶爾丹未滅調度軍務親莅塞外因念切民依巡歷邊境所至咨訪目擊山西陝

西緣邊一路地皆沙磧難事耕耘人多穴居類鮮恒業
其土壤磽瘠固已生計維艱而地方遼遠疾苦無由上
聞大小官吏不能子愛小民更恣橫索遂使里井日漸
虛耗比年用兵以來一應軍需芻糗俱動支正項錢糧
儲侍供應從不取辦閭閻乃各府州縣官員借端私徵
重收火耗督撫布政使等官又不仰體朝廷恤民至意
糾察貪汙禁革加派反多瞻徇曲庇又或督撫庸懦懈
弛因而筆帖式及衙門人役無所忌憚擅作姦弊以致

民生滋感朕心深切軫惻今外寇已經蕩平惟以綏乂
地方拊循百姓為急務山陝兩省關係緊要應作何撫
恤休養著九卿詹事科道詳議以聞

六月戊寅山西巡撫倭倫疏請建

萬壽龍亭恭勅

聖諭

上諭大學士等曰何事建立龍亭若果善民自感頌大同
田薄民窮其建龍亭著停止倭倫奏稱大同地方飼馬

萬匹全不費民力自朕觀之前大同養馬不過六千未始不用民力朕因民勞苦故將康熙三十六年錢糧盡免朕凡事俱務實行不尚過譽爾等可曉示之

康熙三十七年戊寅二月庚午

上諭大學士等曰山東巡撫李煒居官不善地方饑饉百姓乏食竟不奏聞及至言官叅奏始行具疏朕為人君於國計民生日切存心詳加審慮李煒身任巡撫不知撫恤百姓朕又何賴焉著革職

五月甲申戶部議覆總督倉場侍郎德珠等疏言
直隸朝鮮等處米貴將各省漕糧截留一十五萬
石賑濟請令有漕各省督撫於本年秋收時買補
帶運還倉應如所請

上曰此截留賑濟等項所費米石若令有漕省分採買帶
運則小民運丁必致苦累京倉米石充裕所用之米無
多採買補額著停止

康熙三十八年己卯九月戊申

上諭大學士等曰各省採買物件科派累民不若折色解京官買總之累民之事雖纖毫亦不可行向日口外蒙古困窮人不聊生朕近年來任人經理多方撫育培植之今已家給人足樂業安生可見治民之道全在休養也

康熙三十九年庚辰二月乙酉湖廣總督郭琇奏
稱

皇上命臣選奏大量地畝官員但湖南民稀地廣恐清丈

後錢糧較前減十分之二

上曰果於民有益所減雖倍於此亦有何害若不清丈以
荒田著落他人徵收錢糧有累羣黎斷不可也此事基
重保題丈量官員爾具疏來照所請行

三月甲午朔

上諭大學士等曰修築永定河夫役雲集人多則需米穀
價必致騰貴遣戶部賢能司官二員截山東河南漕米
二萬石留於信安柳岔二處會同地方官照前稍減時

價平糶至附近信安修河諸處屯莊米石亦令糶賣有
益於民令內務府總管查明具奏

康熙四十一年壬午閏六月癸未戶部議覆山西
巡撫噶禮疏言右衛駐防官兵浮給康熙三十六
年分草束折色銀兩請交各旗追還

上曰此浮給官兵草束折色銀兩復行追賠殊為可憫若
向誤給官吏追補必致派累小民其免之

康熙四十二年癸未正月壬申

上巡閱南河駐蹕長清縣界首鋪

諭大學士等曰昨夜大風南村失火朕遣大臣侍衛撲滅之小民遭此深為可憫著傳諭巡撫布政使察明被災房數并議作何行賞之處大學士等遵

旨令巡撫王國昌等察明并議每房一間賞銀三兩

上曰專委地方官行賞小民未必盡沾實惠著交近御侍衛海青等監視散給

二月丙子朔

上諭山東巡撫王國昌曰朕自泰安州見新泰蒙陰沂州
郯城等處城郭鄉村黎民被災甚苦雖蠲免正賦兼行
賑濟猶恐未能大有裨益如以養蒙古之例施於山左
庶青黃不接之際小民得以度日命在京滿漢大學士
九卿會議無論官民有情願効力者作速遣往山東不
拘銀米同地方官分界賑濟以及降級革職人等有情
願贖罪者亦准其贖罪俟秋成之後視其果有裨益酌
量議敘至該撫尤宜董率屬員善為撫綏勿致流離務

期副朕視民如子之至意即將告示刊刻通行曉諭

八月甲申刑部尚書王士正等因山左被災奉

旨截留漕米并派八旗官員領帑往賑具疏奏謝

上曰朕四次經歷山東於民間生計無不深知東省與他
省不同田野小民俱係與有身家之人耕種豐年則有
身家之人所得者多而窮民所得之分甚少一遇凶年
自身並無田地產業少壯者流離於四方老弱者即死
於溝壑此等情由爾省大臣庶僚及有身家者亦當深

加體念似此荒年雖不能大為拯濟若輕其田租等項
各贍養其佃戶不但深有益於窮民爾等田地日後亦
不致荒蕪如果民受實惠豈不勝謝恩千百倍耶

十月庚寅理藩院議覆扎薩克大喇嘛綽朱兒喇
穆扎木巴奏將伊所原居洮州衛卓柰克依特之
廟伏懇開廣修造應如所請

上曰取邊氓之地以廣修廟宇關係民生嗣後凡有廣廟
宇與民間田廬有關者永行禁止

康熙四十三年甲申三月辛酉

上諭大學士等曰朕因山東及直隸河間府等處饑民流
至京城者甚多特命八旗諸王貝勒大臣總管內務府
各官及漢大臣官員於數十處立粥廠日煮粥賑濟務
使流移之人得所酌量賑給數月但此等饑民棄其家
業聚集京城以餬其口實非長策應作何料理始復舊
籍得安生計爾等會同九卿詹事科道等確議具奏

康熙四十四年乙酉三月己亥

上諭山東巡撫趙世顯曰朕為兩河告成特來巡閱道經
山左見民生自去歲休養之後漸有起色朕心甚慰夾
岸黃童白叟懽呼載道感恩叩謝者日有數十萬今仲
春之時麥苗未長未致妨農至回鑾之際正值農忙麥
秀恐妨稼穡爾即曉諭百姓概免叩謝各務農事可也

癸丑

上諭兵部侍郎貝和諾江寧將軍鄂羅舜等曰自江寧至
蘇州坐臺兵丁可令撤去各回本汛今當麥秀之時倘

軼路而行恐致踐傷龍麥且御舟所泊亦時與坐臺處
相左隨駕人員自足環衛爾等轄下兵丁固當在此効
力朕非謂其勞苦而遣歸也但係農時不比冬令耳其
兩岸護送綠旗兵鎮江坐臺兵丁一併撤去

壬戌

上諭江南江西總督阿山江蘇巡撫宋榮曰朕為兩河告
成楊家莊新河建閘特來閱視爾等復偕地方官民再
四懇請故渡江而南見百姓雖不能比戶豐饒幸安居

樂業無憔悴之色朕心少慰編氓皆朕赤子休養生息
已數十年民雖至愚亦所深悉故扶老攜幼日計數萬
隨船擁道歡聲騰沸此皆由中而發非假飾也但人多
路隘萊蔬苗麥瀰漫田野不無踐傷朕甚惜焉爾等即
出示曉諭萬勿踏壞田禾有負朕恤民之意

康熙四十六年丁亥七月戊寅

上諭大學士等曰浙江巡撫王然江南江西總督邵穆布
奏報旱災以此揆之被旱之處甚廣朕屢幸南省其地

方山川形勢及小民生業鮮有不知者南方溝洫最多水之出入固易然亦只可備平常小旱而已若至大旱河蕩盡涸惟近大河之處猶可薄收若田高河遠之處水不能到必至全荒且小民有田者少佃户居多豐年則納糧之外與佃户量其所入分之一遇歲歉則佃户竟無策可施矣南方旱濕民間難以蓋藏故比户而居有米者少凡飲食諸物每日見買此數年幸遇豐稔可以無虞今遇大旱所關匪細奏聞之後若能得雨不必

言矣如未有雨不早加詳議殊非朕保民如赤子之心
矣著九卿詹事科道會同速議具奏

十一月己未

上諭大學士等曰福建內地之民居住臺灣者甚多比來
游罹災祲米穀不登若土著之人猶可採捕為生內地
之民在彼者糧食缺少難以自存欲歸故土則又隔大
洋誠為可憫著行文該地方官察明情願復歸本地者
或遇兵丁換班之船或遇公務奉差之船令其附載帶

回原籍

康熙四十八年己丑七月乙亥

上諭大學士等曰湖廣江西稻穀豐收沿江之米甚多而近日江浙米價愈貴朕為民生計時切憂勞輾轉思之上江之米不禁其沿江而下者特欲使江浙米價平耳今富豪之家廣收湖廣江西之米囤積待價於中取利雖米船沿江而下而糶賣之米愈少此事關係貧民甚大爾大學士及九卿諸臣皆國家倚賴之人所以為民

生憂慮者必與朕同當何如有濟於民著公同詳議速奏

己卯大學士九卿等遵

旨議覆湖廣江西產米甚多但恐富商囤積圖利應嚴查禁止

上諭大學士等曰朕因湖廣江西之米商販由江而下者多而江浙米價不減故命爾等會議若將囤積米石定例禁止則借此橫查不過利於胥役而已百姓不但無

益反致受害矣爾等但言其枝葉未究其本源朕意以
為必於本源之地清查自無收買囤積之弊湖廣江西
之米或江浙客商或土著人民某人於某處買米若干
清查甚易應行文湖廣江西督撫委賢能官將有名馬
頭大鎮店買賣人名姓及米數一併查明每月終一次
奏聞并將奏聞之數即移知江浙督撫湖廣江西之米
不往售於江浙更將何往此米衆所共知則買與賣不
待申令而米之至者多即大有利於民也

康熙五十二年癸巳二月丁丑

上諭吏部尚書兼管倉場事務富寧安等曰朕聞京城近日米價較往年稍貴想因直隸各省人民今歲來京甚衆之故應發倉米一萬石照時價減糶則米價可平於民生大有裨益若一萬石不敷即再發一萬石平糶

四月辛亥

上命都察院左都御史趙申喬往廣東平糶倉穀

諭之曰朕覽廣東奏銷冊內見存米二萬餘石以之減價

平糶似屬有益爾至廣東詳查如所糶穀石尚不足用
即速奏聞朕令動正項錢糧買米平糶江西湖廣二省
不禁商人販米良有益處前江浙米貴朕諭將湖廣江
西米船放下江浙米價遂平廣東督撫若於正月間早
行奏聞則海運可及今風信不順海運尚難行也

五月庚辰

上諭大學士等曰提督康泰奏稱蜀省一碗水地方聚集
萬餘人開礦隨逐隨聚見在差官力行驅逐朕念此等

偷開礦廠者皆係無室可居無田可耕之貧民每日得
錙銖為養生之計若盡行禁止則伊等何以為生果如
滇省礦廠所出頗多亦可資助兵餉此處所出無多應
令該地方文武官員盡心設法使窮民獲有微利養贍
生命但不得聚衆生事妄行不法耳

六月己丑

上駐蹕熱河行宮

諭大學士等曰從來壬辰癸巳年分雨水應多去歲幸而

未滂觀此兩日雨勢連綿此處山水或發亦未可定東
邊之隄因城牆所逼水必洶湧東邊巡守之人在河灘
中者若不小心則無走避處矣應預為之備至於貿易
人民所居之屋凡當澗口之處亦各應防備若山水夜
發當水處恐致被衝將此曉諭

辛卯

上諭大學士等曰連日之雨朕甚恐致滂今晴甚佳人居
高處尚無妨但田禾可惜耳昔人謂壬辰癸巳年滂去

歲獲免倘今歲五月初十間雨至此時可奈何朕記

太祖皇帝時壬辰年澇大饑另戶人家以致賣身

世祖皇帝癸巳年霪雨大澇京城內房屋牆垣傾頽不堪
明成化時癸巳年澇城內水滿民皆避居於長安門等
處後水至長安門復移居端門前至棋盤街今歲朕未
來時雨水甚大老人有言後澇不及前澇但霪雨不止
則田禾倒青矣朕甚慮之

九月辛未戶部等衙門題廣東廣西總督趙弘燦

浙江福建總督范時崇等言將江南浙江米石運至廣閩備用於地方民生大有裨益應將江南省捐納米十萬石令總兵官穆廷斌總管船隻運至閩省廣東督撫撥船至閩省接運往廣東浙江亦報被災將五萬石仍留浙省將五萬石令總兵官吳陞運至閩省

上曰浙省今歲歉收十萬米石仍留備用江南十萬石內將五萬石運至福建五萬石運至廣東米到日即行平

糴勿致浥爛

十月庚寅

上問戶部尚書張鵬翮曰錢糧之數若何張鵬翮奏曰此數年因

皇上所免錢糧甚多今見動用至四十九年錢糧

上曰即動至五十年錢糧亦無妨爾等為戶部故如此奏耳朕心惟百姓為重今廣東福建沿海之府州縣等處正青黃不接之時尚宜酌量免其錢糧張鵬翮奏曰頃

皇上特加殊恩已令運米賑濟矣

上曰米雖運去但足餬口耳不能辦錢糧也張鵬翮奏曰
至彼時再行請

旨

上曰不可遲延今即其時矣

康熙五十三年甲午三月乙巳

上諭戶部甘肅一帶地方去年春麥失收秋田亦歉經該
督撫奏報甚明其地俱係山田稍遇天旱易致荒歉是

以舊歲特沛恩澤蠲免租賦見在雖據該督撫設法賑濟給與牛種此外更應作何籌畫使小民得所永有裨益著遣工部右侍郎常泰大理寺少卿陳汝咸到彼會同該督撫詳查地方百姓情形確議具奏

癸丑

上以甘肅被災

命工部右侍郎常泰大理寺少卿陳汝咸前往察勘

諭之曰朕曾至寧夏其地方有似蒙古所種惟青稞遇歲

不收民即流散爾等到彼應與總督鄂海巡撫岳拜計
議教百姓牧養牛羊蓋甘肅地方不比直隸山東與蒙
古同宜畜牛羊雖遇荒歲食乳亦可度日矣又其地產
肉蓯蓉天門冬煮食之味似山藥又一種沙米亦可食
被災諸處爾等悉親身往勘會同督撫酌議以聞

六月丙戌

上諭領侍衛內大臣等曰天氣甚熱貿易人等多夜行者
伊等但知為利不顧其身朕甚念之嗣後有緊要事方

許夜行朕視商民皆如赤子無論事之鉅細俱當代為熟籌也至於一應隨行官員兵丁執事人等如有公事不必過亟緩緩前行將此交與兵部自喀喇和屯以至口上俱遍張告示併於各該管處通行曉諭

十月壬辰甘肅巡撫綽奇疏言甘肅寧夏等處今歲被災窮民請計口散賑至來年夏收時停止

上諭曰甘肅地方被災流移各處就食之民見令招回本處但時尚沍寒本處竝無糧米招回無益俟來年春耕

時送回方有益也

康熙五十五年丙申閏三月壬午

上諭大學士等曰直隸巡撫趙弘燮因順天永平兩府所屬地方米價騰貴民多乏食奏請借帑銀差官貴買賤賣再借莊頭積貯之米減價糶賣朕思治天下之道以養民為本當此太平之際而使民乏食可乎從前如福建廣東遠處偶遇災荒猶海運賑濟况京師畿輔之地乎去年順天永平保定河間宣化五府因雨水過多米

穀歉收已將錢糧盡行蠲免積貯之米減價糶賣見今
間閭積貯無多若又以銀買穀則米價益加騰貴今京
倉通倉之米甚多將倉內所貯之陳米發二十萬石遣
堂司官運至各處地方不論旗民確查賑濟窮民始得
均沾實惠且直隸北四府地方有水路可通即由旱路
運去亦不甚遠不過在人區畫而已至於運米腳價以
米給之亦可煮粥之柴以米易之亦可近京之地減價
糶賣今又發陳賑濟則小民斷無乏食之虞矣又

諭曰朕聞今年直隸南四府地方麥苗甚好但麥收時亦止有地之人得食而已未種麥之人何由而得朕意此番賑濟須至九月民方不致乏食每歲五城煮粥施濟至三月即止今尚未停止於民大有裨益古之人君居深宮之中不知民間疾苦者甚多朕巡行各處曾目擊之故知之甚確又於直隸各省年穀豐歉時加訪問地方大吏所以不敢隱瞞朕凡事但求實濟不務虛名即如積貯之事聞之似善行之甚難從前連歲豐收朕曾

諭地方官令民間節省積貯但窮民一年所得餬口之外別有費用何得餘剩至於社倉一事李光地任直隸巡撫時曾以此為有益卒不能行今太平已久生齒日繁而田土未增且士商僧道等不耕而食者甚多或有言開墾者不知內地實無閒地今在口外種地度日者甚多朕意養民之道亦在相地區處而已陝西臨洮鞏昌等地方雖不可耕種若於有水草之地效蒙古牧養則民儘可度日而百姓但狃於種地不能行此昔年去

山東賑濟人員曾云或有人在牛旁不知取乳而食坐以待斃此皆不習之故耳爾等將趙弘燮所奏之事會同九卿確議具奏

五月壬戌

上諭大學士等曰京畿地方至今雨未霑足朕心不勝焦勞自密雲至口外田禾甚佳及問各處來人俱云雨水尚有不足之處念京城人民輻輳就食者多且太平日久人口滋生多至數倍以此平素間諄諄以此事面諭

諸大臣今值曠旱之際若再不亟為籌畫朝廷之上所
理者何事乎閱此次報內米價又長八旗官兵糧米定
例於八月內支放今若候至八月米價必愈加騰貴著
於五月初十日起即行支放至京城米石若仍行減糶
甚為有益著再發米三萬石交與原派賣米官員減價
糶賣爾等轉諭戶部

康熙五十六年丁酉六月丙戌

上諭大學士等曰今年雖旱然得雨之後或連綿陰雨亦

未可定應傳八旗軍民人等將危圯房屋牆垣修理滲漏之處早行苫蓋并潮濕朽壞物件移置高處凡事豫則易備朕凡經歷之處心思所到即行傳諭即不連綿陰雨平常豫備亦可也

十月癸卯

上諭大學士等曰朕理事五十餘年無時不以民生為念凡巡行所至之地即加訪問故於民之疾苦無有不知各省奏事之人伊所過地方年景豐歉米價貴賤無不

詳悉問之故總督巡撫提督總兵官等一切事皆無敢
隱匿者今年各處皆豐收河南連年大熟朕念切民生
爾諸臣當體朕恤民之意凡有聞見之處即當奏聞不
可佯為不知也

康熙五十七年戊戌八月庚子

上諭大學士等曰聞今年安徽所屬地方出蛟發水甚是
傷民前日曹頌家人來奏晴雨錄詢問是實總督巡撫
雖未啟奏朕既聞知心切軫恤京中有安徽地方官員

著九卿速行問明

康熙六十年辛丑四月己酉

上諭大學士等曰去冬雪大所以今春雨澤甚少大約冬雪多則春雨必少春雨少則秋霖必多此非有占驗而得知者也朕六十年來留心農事較量雨暘往往不爽且南方得雪有益於田土北方雖有大雪被風飄散於田土無益今歲山東得雨河南山西陝西未甚得雨備荒最為緊要不可不預為籌畫若直隸山東河南已難

料理至山西陝西其補救尤難古人云三年耕則有一
年之積九年耕則有三年之積言雖可聽行之不易如
設立社倉原屬良法但從前李光地張伯行曾經舉行
終無成效至於各省積貯穀石雖據報稱數千百萬實
在存倉者無幾即出陳易新之法亦不為不善第春間
僅有所出秋間竝無所入州縣官侵蝕入已急則即以
折銀掩飾此等積弊朕知之甚詳其報荒之真偽虛實
朕亦無不洞悉如熱河所積穀石每年減價平糶秋收

糴補還倉數目無多稽查頗易所以每有餘糧語云大
兵之後必有凶年昔征勦三逆時豐收足以供給竝無
一州一縣貽悞及平定以後間有歉收之年不可不綢
繆於未雨也邇來稍覺曠旱或者政事有缺失應行改
正之處亦未可定爾等會同詳議具奏

五月甲申

上諭戶部朕御極六十年自冲齡時惟以黎庶為重宵旰
圖維勤勞至今今春朕之子孫暨六世孫輩與舉國官

兵人民請行大慶典禮在朕固所應受衆亦咸以為宜
朕意昔年辛丑係

皇考賓天之歲今歲又值辛丑況西陲用兵事尚未竣是
以堅辭不受今年朕躬自四月違和五月初旬又復感
寒遂覺甚病以致面色稍減或稍行動或多言語便不
勝倦乏目今直隸山東河南山西陝西麥已無收民多
饑餒屢令大學士九卿議奏茫無頭緒似此尚忍而不
言將來不知作何底止也諸大臣皆受高爵厚祿應視

萬民如一身一家各抒拯救之法若必俟朕降諭旨推諉於朕則大臣所任何事耶今朕躬甚弱心思亦短易倦善忘惟諸大臣是賴救民之策不可不急為籌畫著大學士九卿等速行詳議甚勿輕視倘再遲時日被災之民不能待矣

九月辛亥

上諭近御侍衛等曰爾等日侍朕側於朕心憂勞之處差知大槩若百官萬民何從而知朕日理萬幾其他姑置

勿論即每年春時為雨水田禾時刻不忘留心究問直至秋成始稍釋念至於冬日內地常恐雪少口外地方又恐雪大此等苦心惟身歷方能知之即爾等日侍左右者亦未必悉知也

康熙六十一年壬寅二月乙酉

上諭吏部侍郎張廷玉內閣學士勵廷儀曰去歲秋冬雨雪頗少今春已屆清明尚覺亢旱民以食為天朕以萬姓為念雨暘不時朕心豈能安乎見今各處為朕祈福

不如祈雨倘得大沛甘霖朕即以為福矣

六月壬戌

上諭大學士等曰盛京地方屢歲豐收米穀價值甚賤民間或致濫費著令盛京米糧不必禁糶聽其由海運販賣可傳諭盛京將軍府尹知之

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷二十二

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷二十三

任官

康熙三年甲辰四月己未

上諭吏部向來所定部院衙門滿洲蒙古漢軍官員品級
陞轉與漢官不同滿洲蒙古官員無向外陞轉之例故
其品級稍優今漢軍官員既與漢官一體向外陞轉其

品級陞轉應與漢官畫一爾部酌議安確以聞

五月壬午

上諭吏部都察院近日内外文武各官考滿一等二等甚多豈無一才力不及不稱職者此後各部直隸各省文武官員考滿將三年之內某官所辦某事奉旨改正者某事駁行者某事處分者某事察明保奏若考過一等二等官員不能稱職者事發之日將考核時具保之官一併治罪

十月辛未

上諭吏部兵部都察院近見考滿內外各衙門具奏吏部等衙門又行覆題以致事多繁冗賢否甚難甄別內外大小文武各官除今年考滿外以後每三年彙考一次其到任未經三月者不必考向來自陳等官仍照舊例自行陳奏候旨定奪至於司屬漢官定例陞授時如無考滿之人論俸深者陞授又於一年一次考核無益著停止應行事宜爾部院酌議具奏

康熙七年戊申三月丁未

上諭吏部國家政務必委任賢能乃可贊成上理今在京各部院滿漢官員俱論資俸陞轉雖係見行之例但才能出衆者常以較量資俸超擢無期此後遇有緊要員缺著不論資俸將才能之員選擇補用

辛酉

上諭吏部舊例科道乏員行取在外有司考選補授原因有司乃親民之官諳悉民間利弊得以據實指陳有裨

政治且外官內擢足以鼓勵人才振興吏治今後科道
缺出可移文督撫就有司內舉才能夙著者咨部爾部
詳核具題行取來京朕親選用每歲宜行取幾人爾部
酌議以聞

康熙八年己酉十月癸亥

上諭吏部朕思部院事務殷繁諸司官職掌必得賢能方
克勝任今爾部但就部院見任官員調補其隨旗上朝
者豈無賢能可備擢用之員可諭滿洲漢軍都統副都

統等於阿達哈哈番以下拖沙喇哈番以上有明習滿文或通曉漢文夙具才幹堪任部院事務者從公詳擇一旗數員咨送爾部俟各旗缺出與應陞者並題補用

康熙十二年癸丑九月辛未

上諭吏部向來定例外官告病不准起用原以防其規避但其中有才品優長政績素著者迫於一時至情引例告歸終身棄置深為可惜宜令地方督撫確行諮訪果有才品堪用者著據實保奏以憑擢用

康熙十三年甲寅三月丁丑

上諭吏部大兵進剿逆賊指日蕩平地方恢復之後即應設官撫綏民生料理事務頃以需人甚急已將漢軍內可用人員照該督撫所請發往軍前候用其漢人中素有清操及才能堪任煩劇者不拘資格著漢大學士以下三品堂官以上據實保舉發往軍前與漢軍官員一體委用務期虛公推薦有裨地方以副朕廣攬人才之意

康熙十四年乙卯閏五月戊子朔

上諭兵部秦省巖疆重地軍務方殷靖逆將軍侯張勇忠勤懋著謀畧優長久鎮西陲奠安疆宇近復躬履行間殫心籌畫屢敗賊衆恢復城池志期殲逆渠定秦隴朕甚嘉之凡用兵籌餉一切機宜必須專其責任而後可以整飭軍機齊一衆心以收蕩平之績所屬地方總兵官有故違節制不聽調遣者許即指叅副將以下有臨陣退縮殺良冒功者聽以軍法從事其文官自道員以

下倘有遲悞緊急軍需者會同巡撫據實題叅務令克展壯猷早奏膚功以副朕委任重意

康熙十六年丁巳十月癸亥

上諭大學士等曰朕不時觀書寫字近侍內並無博學善書者以致講論不能應對今欲於翰林內選擇二員常侍左右講究文義但伊等各供厥職且住外城不時宣召難以即至著於城內撥給閒房停其陞轉在內侍從數年之後酌量優用再如高士奇等能書者亦著選擇

一二人同伊等入直爾衙門滿漢大臣會議具奏

康熙十九年庚申六月丁丑

上諭大學士等曰據都察院題御史洪之傑試俸已滿應行實授朕思試俸各官一年俸滿稱職者實授不稱職者或仍試俸或作何改用宜更定一例不然試俸竟屬虛文矣洪之傑仍如舊例實授可傳諭吏部定例以聞

七月甲午

上諭九卿等曰各部主事日後皆陞道府與其俟為道府

後令督撫保舉何如為主事時即令堂官保舉之為愈
今後凡不係正途出身之主事歷俸三年果能勝任該
衙門堂官保舉方許陞轉

十一月戊午

上諭大學士等曰御史張志棟疏叅大理寺少卿張永祺
國子監祭酒馮源濟二人品行不端甚當又叅刑部尚
書黃機衰老宜罷此言太過當矣國家用人正須老成
練達之輩從來才德難以兼全聞黃機居鄉謹飭安靜

是一老成人也

康熙二十年辛酉正月辛巳

上諭翰林院日講官敷陳經史日侍顧問贊襄典學職務繁多宜廣其員以彰右文之治見在滿官足用漢官尚宜增添著即開列應用各員職名具奏

六月辛亥

上諭大學士等曰行取官員吏部已經引見其各部主事等漢官朕尚未知其人科道為耳目之司選擇不可不

慎爾等即傳諭九卿詹事科道令各舉所知將居官潔
清辦事才能者從公保舉不可以同年同鄉親黨徇情
私保即總督巡撫所舉有不當亦著指陳勿隱

七月丙寅

上諭大學士等曰近來投誠守備千總等官或帶偽總兵
副將劄付即照伊偽劄反加優叙先用其綠旗官員於
軍前効力顯著者並不得表見淹滯者頗多所在統兵
將帥知悉此情者已經回京無人在彼代奏此等官員

甚為屈抑其特行宣諭以示獎勵

戊辰

上諭兵部在外武職官員有未經從逆効力行間勤勞日久者枕戈卧甲躬冒矢石建立功績雖經叙錄加銜加級亦不能即補實缺仍留該標投閒置散虛糜歲月或赴部候補又因無缺守候遲延資斧匱乏深為可憫此等軍前効力之人應令本身赴部驗明原劄即行錄用推補

壬申

上諭吏部兵部大同地方連年荒旱百姓困苦以致流離失所就食他方因而田地荒蕪生計不遂今已屢行賑濟蠲免各項錢糧又聞雨澤霑足秋成有望但饑饉之後安養生全必得清廉愛民官吏方能加意招徠留心撫字著該撫將見任知府以下等官貪劣不職者照常叅處外其才具平常者酌量更調本省簡僻之缺仍於通省見任官員內選擇清廉愛民者調補若果能撫循

使戶口充實田地開墾著有成效該撫特行舉薦該部從優叙錄以副朕獎勵循良愛養百姓至意

康熙二十二年癸亥五月乙卯

上諭大學士等曰部院堂官惟敬慎廉潔方可無玷厥職今觀各部侍郎內雖辦事有才而操守不足者有之應將伊等改授武職向來副都統員缺有將侍郎改授之例自後副都統缺出可將侍郎職名一併開列朕將酌用之

康熙二十三年甲子三月壬辰

上諭兵部國家賞罰所以勸賢懲奸也又語云使功不如使過近見緣事宗室及有罪大臣行間得罪官員閒散者甚衆此輩之人與其置之間散何如委以一職則賢能者可得其用况伊等或任統兵或歷部院較之旗下人等必優已為大臣者姑勿論其以下者應行選用護軍令其効力如此可漸得陞遷之路爾部即遵諭行

四月戊申吏部等衙門奏各處關差奉

旨令臣等於司官內保舉才守俱優存心謹厚之人派往
但司員辦事有才及謹慎者尚有其人至於操守
知之實難不能保舉

上曰節操清廉最為緊要即如部院堂官朕皆信其清操
而委任之堂官於司員亦應信其清操而委任之各衙
門官員或謹慎有守或生事奔競堂官豈有不知者爾
等務將有守之人舉出則被舉者自能效力也

六月丁巳

上諭大學士等曰凡所貴道學者必在身體力行見諸實事非徒託之空言今漢官內有道學之名者甚多考其究竟言行皆背如崔蔚林之好事居鄉不善此可云道學乎精通道學自古為難朕聞學士湯斌曾與中州孫鍾元講明道學頗有實行前典試浙江操守甚善可補授江蘇巡撫

康熙二十四年乙丑三月癸亥

上諭大學士等曰內閣翰林院須用通曉漢文善翻譯者

其自卿員以下部院無品級筆帖式以上及滿洲蒙古漢軍廢官與隨旗行走暨閒散人曉習漢文能譯滿文者統皆考試計其文理優長者用之其下所司速察以聞

九月辛酉

上諭大學士等曰漢軍既有旗分缺又補授漢缺不但人不敷用漢舉人進士亦且壅滯不得銓選漢軍既有外任該旗有缺即以外任漢軍補授亦無不可著九卿等

議奏

康熙二十五年丙寅四月戊申吏部以翰林院掌院學士員缺開列尹泰等請

旨

上曰翰林院學士職任闕繫甚重必學行兼優方為允當滿漢學士得人則詞林觀摩興起咸勤學砥行人材成就有裨治道匪淺曩者喇沙里居是官其學問品行詞林至今追述之後來者俱不能及朕觀尹泰品有餘而

才不足任以詹事則相宜若用為學士恐辦事不甚敏捷庫勒納任此職時較他人為優通政使葛思忒似亦可用可將此二人酌議來奏

癸丑

上諭吏部國家選用臣工必得才學通敏之人畀任斯庶官無曠實得用人之益朕見漢軍官員從事學問者少年未成材便涉仕版並無素抱何以莅事臨民去年特行考試分別去留會將交白卷人員從寬姑免處分令

其學習俟通曉文義該部題明考試錄用朕因從前考校情弊多端今特行親試荒陋不堪者甚衆朕不加搜察私藏懷挾自行發露者已交刑部拏問外其考列一等高璜等及二三四等人員見任者仍照舊供職候補者照常補用王撫民等文理不通及書寫履歷投交白卷者俱著以原品隨旗行走其去年著令學習之人今仍交白卷及考置五等者顯圖僥倖著察議具奏王樑居官有聲仍准候補難廕生馬世永王琨王鎬胡枚念

伊父殉節可憫著令學習俟通曉文義之日該部題明錄用程萬坦曾効力行間著以旗內武職補用爾部即遵諭行

七月乙酉戶部議覆御史戴通條奏坐糧廳監督員缺應將清廉賢能官員保舉差往

上曰各部院官員不稱職者許堂官不時叅奏傳諭已久未見舉行至於保舉揀選不過特旨偶一行之若以此為定例則資俸深者既有壅滯之患而奔競之端亦即

由此而生保舉著不准行

康熙二十六年丁卯四月辛亥

上諭吏部國家用人凡才優者固足任事然秉資誠厚者亦於佐理有裨比部院中亦有一二才優之人所以未即陞擢者因其有才又能循分故久任之朕聽政有年見人或自恃有才輒專恣行事者思之可畏朕意必才德兼優為佳若止才優於德終無補於治理耳

康熙二十七年戊辰十一月辛未

上諭大學士等曰兵部考武官射箭合例者方記冊錄用
或有前在行間顯著勞績若槩以考校不合例之故不
得見用事屬可矜朕已屢有諭旨且射而中者人材皆
優射而不中者人材皆劣不可以此一槩論也若執此
用人則人材優而有勞者終身不得見用矣又聞兵部
閱射情弊有以中者為不中以不中者為中其飭兵部
堂官自此以後其嚴之慎之

康熙二十八年己巳閏三月壬寅

上諭兵部朕幸江南浙江見驍騎校小撥什庫披甲內曾効力行間材力壯健者甚多此輩出兵時有雖得功牌未應得官者亦有因罪抵銷功牌者因是皆不得擢用淹滯可惜其行文江寧杭州荊州西安滿洲將軍副都統等如果有才堪管轄及曾經効力者選擇十人或十五人不拘旗分遇彼處佐領防禦驍騎校缺出即將選擇之人一併咨送來京爾部引見以備任用

六月庚寅

上諭大學士伊桑阿等曰八旗叅領佐領有職任之官多有以疾告休者此中亦有以不能騎射畏憚而求罷者夫管轄職任須得舊人為佳其傳諭八旗都統副都統等自是以後若有告休者詳察之果疾病不可支者允其休致若雖不能嫻於騎射而能管轄者仍留用之

康熙三十一年壬申七月癸酉理藩院以効力年久之撥什庫等引

見

上曰伊等於事務何如侍郎文達奏曰伊等未為司官不曾辦事

上曰辦事在人何論曾為司官朕臨御多年何事未歷部院諸臣欲寬人罪却不務求允當而故擬過重直待駁回旋即改為無罪或注意在此而飾詞在彼實欲為此而佯託為彼此等處最多大凡經理事務須以持平為當此引見諸人曾為撥什庫差遣年久熟知蒙古性情與地方形勢俟理藩院主事缺出將伊等一併選擇具

奏

康熙三十二年癸酉十一月庚子朔

上諭大學士等曰朕每日聽政必於辰刻中御門聞部院
奏事大臣每日黎明即齊集午門外久候方始入奏迨
奏畢復各歸署理事無乃過勞朕觀大臣內有年及六
旬者亦有六旬以上者此後於家中各進糜粥按時來
奏亦不至遲悞大臣節勞養體亦可多為朕効力數年
爾等可將朕旨傳與部院大臣知之

十二月壬申

上諭大學士等曰朕觀近日政務簡少每日啓奏部院大臣中有年邁者甚屬勞苦自後年六旬以外大臣令其量力間二三日一來啓奏至折本內遇緊要事朕有旨傳進爾等方來請旨若無朕旨爾等將折本彙齊亦間三日一來啓奏

康熙三十三年甲戌五月癸卯

上諭大學士等曰國家以用人為要或有知其人可用而

避嫌不舉者或有知其人不善而引為黨援者自今九卿當各將所知居官賢能者敬慎公舉科道官職司耳目誠能於所知賢者從公推薦不肖者立行叅劾則賢者勸而不肖者懲治道豈不美乎可將此旨傳諭九卿科道

甲辰

上諭禮部尚書兼翰林院掌院事張英曰翰林係文學親近之臣向因日講時時進見可以察其言語舉止近日

進見稀少講官侍班不過頃刻豈能深悉著將翰林院詹事府國子監官員每日輪四員入直南書房朕不時諮詢可以知其人之能否以備擢用

康熙三十四年乙亥三月癸亥

上諭大學士等曰翰林官撰擬文章是其專任善與不善皆應有鼓勵懲戒之處自是以後凡碑文祭文其撰擬人姓名及所撰之文或經俞允或被申飭一一記明有三次善三次不善者俱行奏聞

康熙三十六年丁丑七月丙午

上諭兵部都統副都統典兵重任若但於本旗內選授則下五旗即有本旗之王掣肘辦事不得其正者甚多嗣後都統副都統員缺應於左右翼內不論旗分補授

八月辛酉

上諭大學士阿蘭泰曰山陝兩省最為要地以後文職缺人俱令奏聞朕酌量選用

康熙三十七年戊寅十一月甲午大學士伊桑阿

阿蘭泰以年邁健忘疏請引退

上曰大學士最為重任必平坦雍和辦事敬慎者方為稱職至於記事學士可分任之爾二人著照舊供職

十二月丙辰湖廣道御史朱廷鋮條奏服滿候補人員內有係特簡者有卓異者應不論班次即行錄用

上諭大學士等曰覽朱廷鋮所奏未必無故但所言之事有當於理夫治國家者以人才為要朕親簡之官如丁

憂服滿起補與降級及一槩丁憂者校年補授何時得錄用乎凡條奏合宜即為准行其間有私與否朕不問也

康熙三十八年己卯五月癸巳大學士伊桑阿以老疾乞休

上諭大學士阿蘭泰曰伊桑阿為人厚重老成辦事年久爾二人自任大學士以來不生事端凡事推誠從公料理不獨朕知之天下無不知者非尸位素餐者可比伊

桑阿雖以老疾求罷朕不忍令去也

六月戊戌朔

上諭大學士等曰當今凡事皆可緩圖惟吏治民生最難刻緩諺云湖廣熟天下足江浙百姓全賴湖廣米粟朕南巡江浙詢問地方米貴之由百姓皆謂數年來湖廣米不至以致價值騰貴然楚省官吏並未奏報水旱又聞湖南百姓甚苦皆由興永朝王樑楊鳳起三人相繼擾害所致見任總督李輝祖為人誠實辦事頗優但俱

係于成龍薦舉欲其不徇情面將從前廢弛整理斷斷不能李輝祖可召進京以侍郎用原任左都御史郭琇前為吳江縣知縣居官甚善百姓至今感頌其人亦有膽量無朋比郭琇著補授湖廣總督令馳驛赴任

十月己巳

上諭大學士等曰凡上司居官有聲者其所舉之人必佳上司不善則所舉者亦屬庸劣然亦有居官先優後劣者亦有居小吏善而陞遷後改變者若始終如一行止

不改者不多得也

康熙三十九年庚辰七月乙未

上諭大學士等曰觀翰林官及庶吉士內有極貧者衣服乘騎皆不能備將此等查出作何施恩有益供職其丁憂告假回籍之翰林官庶吉士有生計艱難無力至京者著該督撫酌量資助令其來京又翰林官員專司文翰更無他事各省學道員缺應與郎中並差滿任之日仍各回衙門或掣籤或作何差遣爾等會同翰林院議

奏

九月丙午

上諭大學士等曰旗下大臣子弟當令為侍衛執事勤勞
効力今皆令入部院衙門大臣交相顧庇一應陞遷出
差全不論俸之淺深人之優劣擅徇情面選擇保奏其
間攬事恣行者亦有之此輩在部院衙門大臣等彼此
相托不無掣肘見今寫本辦事坐臺馳驛等勞苦之處
大臣子姪誰曾派遣況漢官見任三品以上堂官子姪

不授科道之職若大臣子姪人材果優何處不可効力
必在部院衙門方為美耶今八旗滿洲漢軍大臣除同
族不論外其子孫兄弟伯叔兄弟之子在部院衙門為
司官筆帖式者著查明開列呈覽朕閱其可留者留之
可去者去之上三旗以侍衛執事選用餘著隨旗行走
俟伊等父兄不在任時再行補用部院衙門爾等可與
九卿會同議奏

十月己卯

上諭大學士等曰今年內陞科道官仍管原任事外轉又停科道暫時無缺候補之人不得即補今歲行取以科道用者著補額外御史俾隨九卿議事則伊等苟有一得可以陳奏爾等將此旨傳諭吏部

康熙四十年辛巳二月庚辰九卿等議覆河道總督張鵬翮題請河工官員保守三年不決照臺灣官員例以應陞之缺陞用應准行

上諭大學士等曰河工豈可與臺灣並論臺灣係海外之

地彼處官員俱屬揀用赴任時不帶家屬獨身前往三年後調陞別地此內有意存焉今張鵬翮奏稱河工官員保任三年不決即陞果依此行三年後惟河工官員陞遷其他盡壅滯矣且部中定例亦從此而壞此本發還著再議

三月壬辰九卿等覆奏河道總督張鵬翮題河工官員請照臺灣例叙用應不准行

上曰凡事得中為善不可太過亦不可不及河工官員俱

照臺灣例叙用雖屬不可然竟不准行亦未盡當須按其工程之極險次險與平易者分別作何加級則諸員方肯効力其或才本庸劣而督險要之工或才本優長而督平易之工皆不妨調用爾等可擇善馳驛中書遣至張鵬翮處令分別其工程之極險次險與平易者開明具覆到日再行定議

壬子

上諭大學士等曰據張鵬翮疏稱上險次險等工程但水

性靡常條爾變遷歲修工程或變為險要險要淤塞即
變為歲修各官有實心効力者亦有隨衆塞責者豈可
俱照臺灣之例一體叙用又言河員冒涉風濤與臺灣
官員無異不知臺灣官員三年即陞之例並非僅為風
濤起見且河員見今俱係保題從優補授之人若照臺
灣例叙用必致吏兵工三部條例俱要更改況河工練
員同時陞去獨存新任之員於河工有無裨益之處未
經議及今河員已歷二載其三年之限自前到任之日

扣算抑自今歲明歲扣算且再過三年張鵬翮能保尚在河工否接任河臣焉知從前官員賢否乃欲將河員遽為陞用可乎其不可行之故諭令張鵬翮知之

五月戊子

上諭大學士等曰自古帝王用人行政皆賴大臣薦舉賢良盡事君之大義天下至大為人君者焉能人人而識別之且官方賢否或操守清正或貪污不肖必難掩於百姓必難逃於衆論其居官即此可見矣倘所舉之人

居官皆善此乃實心為國無私之賢臣也所舉有善有不善此其心雖為國特識鑒未到之故耳若所舉皆貪污行私此則大玷為臣之義矣辨別臧否以鼓勵實行權在人主或居小吏時亦有善名及得志之後改行者甚多焉能豫料自茲以後朕惟視其居官操守清廉以為實據無庸豫為疑度也

十月己巳大學士等以湖南按察使員缺將九卿保舉道員施世綸等開列具奏

上諭大學士等曰施世綸朕深知之其操守果廉但遇事偏執百姓與生員訟彼必庇護百姓生員與縉紳訟彼必庇護生員夫處事惟求得中豈可偏私如施世綸者委以錢穀之事則相宜耳

康熙四十二年癸未正月丁卯

上諭大學士等曰湖廣總督郭琇摺奏提督林本植標兵於城內公行焚劫朕思湖廣兵丁驕縱若不用一才能者統轄安能除其惡習林本植年邁著解任將大同總

兵官俞益謨補授湖廣提督令即馳驛赴任兵弁中有深信者并令酌量帶去其帶去兵弁悉以職名奏聞

四月戊戌

上諭大學士等曰今吏部尚書缺尚未補人巡撫李光地徐潮原在內任歷年亦久早應擢用朕因地方起見所以暫留外任伊等居官誠優且得大臣體彭鵬趙申喬行事偏執惟務沽名所以事皆背謬李光地自任直隸巡撫以來每年雨水調順五穀豐登官吏兵民無不心

服吏部尚書員缺以李光地徐潮問九卿尋大學士等
問九卿言二人俱優覆奏

上命李光地為吏部尚書仍管理直隸巡撫事

十二月辛卯

上諭大學士等曰朕今次西巡見直隸河南陝西山西四
省接壤如山西澤州人授以河南懷慶府地方官雖云
隔省相去實不過百里得無徇庇伊弟兄親戚乎又直
隸人在河南接壤處河南人在直隸接壤處居官者甚

多嗣後補授外官時掣籤所得地方如隔伊原籍五百里外聽伊赴任如五百里內雖隔省著迴避

康熙四十五年丙戌三月丙寅九卿議雲南貴州廣西四川四省員缺若本省無應委署之員則委隣省附近官暫令署事俟部選官到日仍回原任

上曰如此議則官員到任仍至遲延令隣省官署事則隣省官少又至懸缺當照年滿千總分發各省候缺著將此四省見出知府以下員缺俱行察明單月掣籤補用

至候缺官員論省之大小缺之多少一省或十五人或
二三十人均勻配算亦歸單月一年一次掣籤分遣俟
有缺出著該督撫指名挨次補授一面報部如未有缺
出暫給俸候缺如此則員缺不致久懸而於事有濟矣

康熙五十一年壬辰二月丁巳吏部以各省學政
任滿開列請

旨

上諭大學士等曰提督學政有教育士子選取人才之責

關係甚要從前學差聲名不善者多間或取二三孤寒因而得名亦不可謂之善今大臣官員子弟內雖亦有學問優者但伊鄉會試時皆以賄進故一得學差取士亦必受賄科道官員知其情弊徇情不行指叅此任甚要開列人員內有爾等所知者可各舉出

三月乙巳

上諭大學士等曰縣令與民切近有刑名錢穀之責未出仕以前如不能諳練事宜則登仕之後於地方民生無

有裨益今歲考中進士除揀選庶吉士外其餘勿令回籍俱交與禮部選翰林內學優品端者數人派令教習文藝從事典禮如有修書處率同修書又考中武進士皆以叅將遊擊守備等項員缺補用此等俱有約束兵丁整飭營伍之責未補官以前不可不先令其學習嗣後考取武進士亦著勿回原籍見在年滿千總皆分撥八旗武進士等亦著分撥八旗隨圍學習行走

康熙五十二年癸巳二月癸酉

上諭大學士等曰福建巡撫覺羅滿保奏閩縣等十六州縣員缺請於卓異人員內揀選補授部議不准督撫等為地方得人起見懇切陳奏理所宜然其應否准行恩出自朕近見督撫等題請之事言官每從中阻撓前曾有御史條奏稱閩屬十六州縣員缺揀選官員補授可為一時之計未可為經久之例不如擇本省之員調補若揀選卓異薦舉官員發往補授必至懸缺以待於地方無益等語閱之似乎有理其實皆係卓異薦舉官員

料伊等即行陞轉不願往海濱苦地希圖美缺因於未經部覆之先求言官條奏則部議自然不准所以特囑言官言之也如此則權盡歸都察院科道等官矣此係明末惡習斷不可長也著問九卿詹事科道

五月庚辰

上諭大學士等曰武官係朕親驗騎射及人材壯健補授故爾識認文官皆係臨民之官關係尤重凡掣籤月官悉行引見應補授者俱行補授其年老不及者令原品

休致惟在外陞補等官槩不引見伊等賢否豈得周知
嗣後作何驗看辨別爾等與九卿會議具奏

九月丁卯

上諭九卿等曰爾等俱為大臣天下督撫之賢否應於平
時留心細訪以備顧問誰貪誰廉即行公舉雖門生故
舊不為徇庇庶皆知畏懼而勉勵矣乃者朕問時或謂
未經同衙門辦事或自謂平日不接見人知之不真以
此推辭非理也

康熙五十三年甲午四月癸酉

上諭吏部補授州同人內不堪者甚多應取至京師令九卿面試補用有出身不明者著革退

康熙五十四年乙未十一月己酉

上諭大學士九卿等曰部院司員見在官職雖卑日後亦可至大僚伊等朕多不認識必數數問諸大臣而用之亦不勝其煩今觀部院司員等劣者甚多考校武進士馬步箭時侍郎覺和託舉止麤鄙向背不知何以辦事

又有一司官因劣革退舊例滿洲不分文武兩途出征時則令於夸蘭大章京等處行走此後部院衙門滿洲司員著輪班佩刀在侍衛裏行如此賢否始見部院漢司官等朕亦未盡認識應照見今翰林分班行走例令伊等分班引見

康熙五十七年戊戌四月丁未

上諭大學士等曰近見八旗補授佐領及襲職官員俱有遲至數年未曾啓奏者此等事甚不宜遲今遲延至此

顯有情弊交與都察院查明題叅其應補應襲之人著
各旗大人帶往熱河引見

康熙六十一年壬寅三月壬子

上諭大學士九卿等曰用人行政朝廷之大權也文官銓
選掌之吏部武官遷除掌之兵部吏部論班論俸兵部
論俸論銜從來定例也其武官歷三年加銜調補之例
甚善近來督撫提鎮題補太多始不過州縣官千把總
之類今則司道副叅亦皆題補矣值此用兵之際姑且

行之此習若久大有關係且伊等題補官員內朕不知者甚多補用後遂皆稱為奉旨補授之員諸臣皆讀書之人何可不慮及此在京大小職官皆朕所選用賢否易知若外省保題之官非朕所素知豈能一一定其優劣乎爾等會同詳議具奏

七月甲辰

上諭兵部撥派年滿千總發往各省分營當差據爾部所議部文一到遇有守備員缺即照所分次序具題引見

以漸補授則往返多需日期員缺必致久懸伊等俱係
朕揀選之人嗣後缺出報部部內即按次序補用不必
引見

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷二十三